

14snem hadien ka kam thombor bashyrkhei ha Benghazi kaba pyniap ia u Nonglamktien ka US; Shah kem uwei



U nongiashim bynta ha lyndet jong ka kam thombor ha Benghazi uba la shah kem noh.

Washington, Rymphang :Uwei na ki nongiashim bynta ba kongsan ha lyndet jong ka kam thombor ba shyrkhei ha u snem 2012 ha ka Mission jong ka US ha Benghazi kaba la shim ia ka jingim jong u Nonglamktien bad lai ngut kiwei pat ki nong America u la shah kem noh, ong ki heh sorkar ha ka sngi Thohdieng ba la lah.

Ka Attorney General ka Pam Bondi ka la ong ba ia utei u briew uba la tip kyrteng kum u Zubayr al-Bakoush la

pynkynriah noh sha United States bad u shah pyngat ha ka kam pyniap briew bad kiwei kiwei ki jingshah kynnoh.

“Ka FBI ka la ioh ban kem noh ia uwei na ki nongiashim bynta ba kongsan ha lyndet jong ka jingthombor shyrkhei ha Benghazi”, la ong ka Bondi ha ka jingialang bad ki nongthoh khubor: "U Bakoush mynta un ngat ha ka jingbishar jong ka ri America ha ka khyndew jong ka America."

Ka Justice Department ka la ong ba ia u Bakoush la pyngat ha ki kam pyntriem ba iadei bad ki kam lehnoh, ka jingpyniap briew ka jingpluh ding ha ka jingpyngat kaba don 8 tylli ki kyndon.U Director ka FBI, u Kash Patel, ula kyntait ban iathuh nangno la kem ia u Bakoush, da kaba ong tang ba ka dei shabar ri.

U Nonglamktien ka US u Chris Stevens bad lai ngut ki nongtrei jong ka America ki la shah pyniap ha ka 11tarik

Nailur 2012 hadien ka jingshah thombor jong ka consulate ka US ha ka nongbah kaba ar kaba heh tam jong ka Libya, kata ka jingthombor ia kaba la kynnoh pyrshah ia ki lehnoh jihadi kiba don ka jingiadei bad ka Al-Qaeda.

Ki lehnoh Islamist kiba la kieng da ki tiar siat automatic bad ki grenade ki la thombor ia ka phyllaw jong ka US ha ka por ba katei ka ri kaba riewspah ha ki mar umphniang jong ka North Africa ka la jot la pra na ka thma pohiing.

Ki la thang ia katei ka iing kaba la pyniap ia u Stevens bad u riew shemphang ha ka IT, u Sean Smith namar ka jingringia ka tdem, bad nangta ki la thombor ruh ia kawei ka jaka treikam jong ka CIA ha kaba arngut ki kontraktor ki la iap, baroh arngut ki dei ki Navy SEAL barim.

Katkum ka jingpyngat u Bakoush la ong ba u dei u dkhot jong ka Ansar al-Sharia bad u dei napdeng ka kynhun jong palat 20 ngut ki briew kiba la kieng atiar bad pynlong ia katei ka jingthombor kaba nyngkong eh ia ka mission jong ka US ha Benghazi.

Shim jingkitkhlieh ka kynhun IS halor ka jingpynbthei bom kheiñduh kaba pyniap 31 ngut ki briew ha Islamabad

Islamabad, Rymphang :Ka kynhun kieng atiar Islamic State (IS) ka la shim ia ka jingkitkhlieh ha kaba iadei bad ka jingpynbthei bom kheiñduh kaba la jia ha ka sngi Thohdieng ba la lah hapoh ka Mosque jong ki Shiite ha ka Nongbah Islamabad kaba la pyniap haduh 31 ngut ki briew bad pynmynsaw ia palat 169 ngut kiwei pat.

Kane ka kam thombor ha ka nongbah jong ka Pakistan ka dei kaba shyrkhei tam naduh ka jingjia pynbthei bom kaba la jia hapoh Marriott hotel ha u snem 2008.

Ki heh sorkar ki la iathuh ba 31 ngut ki briew ki la iap ha katei ka jingbthei bom kaba la jia hapoh ka mosque Imam Bargah Qasr-e-Khadijatul Kubra kaba don ha ka thain Tarlai harud ka nongbah, ha kaba da ki s;pah ngut kiba mynsaw ki la don hapdeng ka jingshah sumar. La khmih lynti ba ka jingiap ka lah ban nangkiew shuh shuh namar ka jingdon jong kiba mynsaw jur.

Kane ka jingbthei bom ka la jia ha ka por jong kas jingduwai sngi Thohdieng ha kaba ki mosque ha kylleng ka ri ki dap da ki nongwan mane blei.

“U nongthombor u la shah pynsangeh ha ka khyrdop ban rung shapoh hadien ba u la pynbthei noh ialade”, ong ka tyllong khubor pulit lyngba ka lad



Ki kynhun aijingiarap bad pulit ha ka jaka ba la jia ka jingpynbthei bom kheiñduh.

pathai khubor.

Ka IS ka la ong ba uwei na ki dkhot jong ka u la thmu pyrshah ia ka jingialang leh niam da kaba pynbthei ia ki bom kiba u la kit ha la ka jong ka met kaba la wanrah ia ka jingiap bad jingmynsaw jong kiba bun ki briew”, kane ka long katkum ka SITE Intelligence Group kaba peitngor ia ki lad jingiadei jong ki lehnoh jihadi.

U Muhammad Kazim, uba dei u nongtan leh niam 52 snem rta ula ong ba ka jingbthei ka long kaba khlain bor ka la jia hapoh katei ka jaka mane blei ha ka por ba ka jingleh niam ka dang shu

sdang. “Ha ka por ba ngi dang pynkhreh ban dem khrup ka jingbthei ka la jia kynsan”, u la ong.

Uwei pat u nongleh niam u Imran Mahmood, u iathuh lyngba ka lad pathai khubor ba ka la don ka jingiather kuli hapdeng utei u nongpynbthei bom bad uba lah ban don lang bad ki bor pahara kiba treimon sngewbha ha katei ka mosque.

“Une u riew kheinduh u dang pyrshang ban jam shakhmat, hynrei uwei na ki nongtrei mon sngewbha jong ngi uba la mynsaw u la siat ia u nadien bad dei na ka lbong jong u”, u la ong lyngba ka lad pathai khubor.Hadien kane

une u lehnoh u la pynbthei noh ialade,” ong u Mahmood uba la don ha ki rta kumba 50 snem.

U Myntri Rangbahduh ka ri u Shehbaz Sharif u la byrngem tyngeh ba kito kiba donkti sha lyndet jong kane ka jingbthei bom kin shah pyngat ha ki kyndon aiñ.

Katei ka kam thombor ka dei kaba shyrkhei tam ha ka nongbah jong ka Pakistan, naduh u bnai Nailur 2008, ha kaba 60 ngut ki briew ki la iap na ka jingpynbthei bom kheiñduh lyngba ka trok kaba la pynjulor ruh ia ka bynta jong katei ka five star hotel Marriott.

Haduh u Jylliew ai por khatduh ka US ia ka Ukraine bad Russia ban iateh jingsuk :Ong u Zelensky



U Vladimir Putin, u Zelensky bad u President Donald Trump ka US.

Washington, Rymphang :Ka US ka la ai por khatduh ia ka Ukraine bad ka Russia haduh u bnai Jylliew ba kin poi sha ka jingiateh kular ban pynkut noh ia ka thma kaba la jan neh saw snem kynthih, ong U President ka Ukraine, u Volodymyr Zelensky sha ki nongthoh khubor.

Lada ym lah ban pyndep ha ka por ba la buh ha u bnai Jylliew ka sorkar Trump ka lah ban buh jingeh ia baroh arliang mamla ban pyndep ia ka, u la bynrap.

“Ki nong America ki tyrwa ba ki kynhun kin pynkut noh ia ka thma ha kaba sdang jong kane ka aiom lyiur bad lehse kin banbor ia ki kynhun thik katkum kane ka por ba la buh,” ong u Zelensky haba kren sha ki nongthoh khubor ha ka sngi Thohdieng ba la lah.

"Bad ki ong ba ki kwah ban pyndep lut ia ki jingdonkam baroh kat haduh u bnai Jylliew. Bad kin shim lut ia ki sienjam ban pynkut noh ia ka thma. Bad ki kwah ia ka por

kaba shai jong baroh ki jingjia," u la ong.

U la ong ba ka US ka la tyrwa ban pynlong ia ka sien kaba bud jong ka jingiakren ba lailiang ha ka taiew ban wan ha ka ri jong ki ha ka sien kaba nyngkong, kaba lah ban long ha Miami, ong u Zelensky. "Ngi la pynthikna ia ka jingiashim bynta jong ngi," u la bynrap.

Kane ka jingai por ba khatduh ka dei hadien ka jingiakren lailiang ba la pyniaid da ka US ha Abu

Dhabi kaba khlem pynmih kano kano ka jingseisoh namar ki liang kiba ialeh pyrshah ki bat skhem ia ki jingdawa kiba iapher jingmut.

Ka Russia ka pynbor ia ka Ukraine ba kan mih noh na ka thain Donbas ha kaba ka jingialeh ka dang jur bha, kata ka jingdawa kaba ka Kyiv, ka ong ba kan ym lah ban pdiang satia.

Kane ka jingpynpaw jong u Zelensky ka la wan long khyndiat sngi hadien ba ka Kremlin ka la pynpaw biang ia ka jingkhoh jong ka ia U President ka Ukraine, u Volodymyr Zelensky ba un wan sha Moscow na ka bynta ka jingiakren iasuk katba ki jingpyrshang ba la ialam da ka US, ban poi sha ka jingiateh kular ban pynkut noh ia ka thma ba la jan kynjoh saw snem hapoh Ukraine ki nang jur.

Ka Kremlin ka la pynpaw ia kane ha ka por ba kine ki artylli ki ri ki dang pynlong ia ka jingpynphai markylliang ba dang shen eh ia kiba iap na ka thma, bad hadien katto katne kynta, ka la kyntait ban kren eiei halor ki khubor ba la mih ba ka Moscow bad ka Kyiv ki la mynjur ban sangeh noh ia ki kam thombor markylliang ia ki jaka pynmih bording hapdeng jong ki.

Mynsaw jur u heh ka Tnad syntiat shipai ka Russia hadien ba shah siat bun kuli ha Moscow

Moscow, Rymphang :Uwei u heh ka tnad syntiat ba pawkhmat ki shipai Russia ula ngat ha ka jingmynsaw jur hadien ba ula shah siat bun kuli ha ki briew ki bym lah ban ithuh ha Moscow.

Ia u Vladimir Alekseyev uba dei u deputy head jong ka tnad syntiat ki shipai Russia ka GRU la shah pynkit noh mar mar sha hospital hadien katei ka jingshah thombor ha kawei ka iingshong briew kaba don ha ki bynta ba shatei sepgi jong ka nongbah, ong ka lad pathai khubor.

Ia ka jinglong jingman jong u ym pat lah ban tip thikna. U Alekseyev u dei uwei pat u leh shipai uba dang shen eh u ban ngat ha ka jingshah thombor ha ka nongbah naduh ba ka Russia ka la hiar da ka thma ba pura ia ka Ukraine mynta la jan saw snem kynthih.

Ka tnad syntiat ka Ukraine (HUR) khaim hashwa ka la ithuh ia u kum u briew ba kongsan uba don ka



U heh ka tnad syntiat ki shipai Russia uba la shah siat iap ha Moscow.

jingkitkhlieh halor ki jingpynkhreh kiba iadei bad ki jingther namding bad ki jingthombor lyngba ki liengsuñ pyrshah ia ki riew paidbah jong ka Ukraine.

U Alekseyev u dei ruh uba la shah pynjari kyndon ha ka European Union hadien ba ka kynhun syntiat shipai ka GRU jong ka Russia ka lashah kymoh

donkti ha lyndet jong ka kam thombor da ki kynja chemical ba la tip 'nerve agent' ha u snem 2018 ha Salisbury, UK.

Nalor kata u la shah pynjari kyndon ruh ha ka US ha u snem 2016 namar kam bymman lyngba ki kor internet ha ka por ba pynlong ia ka elekshon president ha America, ha kaba u Donald

Trump u la jop ia ka samoi treikam ba nyngkong jong u.

U Alekseev u dei u nongialam uba ar ha ka Main Directorate jong ka General Staff jong ki shipai ka Russia naduh u snem 2011. La iathuh ba la pynkup burom ia u da ka Kremlin da ka nam kum u riewshlur jong ka Russia ha u snem 2017.

Tuid da ki hajar ngut ha ka jingleit on tep ia u khun u Muammar Gaddafi uba shah siat iap



Ki paidbah kiba rah ia ka dur jong u Seif Al-Islam ha ka jingleit on tep.

Tripoli, Rymphang :Da ki hajar ngut ki paidbah ki la iamih ha ka sngi Thohdieng ba la lah na ka bynta ban tep ia u khun ba la shah pyniap jong u nongsynshar barim ka Libya, u Muammar Gaddafi ha ka shnong kaba dang bat ia ka jingshaniah ha une u nongialam ba la slem bha.

U Seif al-Islam Gaddafi, uba shisien la iohi da ki katto katne kum u nonghiar pateng

jong ka Libya, ula shah siat iap ha ka iingsah jong u ha ka nongbah Zintan, kaba don shaphang shatei sepgi jong ka Libya ha ka sngi ba Ar ba la lah.

Ka jingtep ia u ha ka shnong Bani Walid, kaba jngai kumba 175 kilomitar shaphang shathie jong ka Tripoli ka la khring lang da ki hajar ngut ki nongkyrshan jong u Gaddafi, jan 15 snem

hadien ba une u nongsynshar u la shah pynkhyllam na ka bor bad shah pyniap ha ka jingiakhiih ba la kyrshan da ka NATO ha u snem 2011.

“Ngi don hangne ban synran ia uba ieid jong ngi, u khun jong u nongialam jong ngi ha uba ngi la buh ia ka jingkyrmen bad ka lawei jong ngi”, la ong ka Waad Ibrahim, ka longkmie 33

snem ka rta kaba na Sirte, kaba jngai haduh 300 kilomitar na Sirte.

Katei ka longkmie ka la kynnoh ia ki kynhun ialeh pyrshah jong ka ri na ka thain shatei bad shathie halor kane ka jingshah pyniap jong u Seif al-Islam.

“Ki la iakynduh ha France ban mynjur ba tang kawei ka jingkhanglad kaba ieng ha ka lynti jong ki ka dei u Seif al-Islam” ka la ong haba kdew ia ka jingiakynduh ba dang shen kaba la pynlong da ka US ha Paris hapdeng ki heh sorkar na baroh arliang mamla.

Ka Libya ka dang iakhlad hapdeng ka sorkar jong u Myntri Rangbahduh ka ri u Abdelhamid Dbeibah ba la kyrshan da ka UN kaba don ha Tripoli bad ka sorkar mihngi ba la kyrshan da u Khalifa Haftar.

Haduuh mynta kane ka ri North Africa ka dang iaksaid ban khie im biang na ka jingkulmar kaba la mih hadien ka jingiakhiih jong ka Arab Spring ha u snem 2011.

Iap da ki phew ngut na ka jingthombor ki shipai ka RSF lyngba ki drone ha ka thain Kordofan ka Sudan

Khartoum, Rymphang :Da ki phew ngut ki briew ki la iap ha ka jingthombor ki shipai Rapid Action Force (RAF) lyngba ki drone ia ka nongbah ba kongsan jong ka jylla South Kordofan ka Sudan, kynthup ia ki headquarter jong ki shipai bad ka jaka iew ba kongsan.

Kiba bun ki jaka jong ka Dilling kynthup ia ka jaka treikam jong ka 54th Brigade jong ki shipai Sudan bad ka jaka iew ba kongsan ki la shah thombor lyngba ki drone ha ka sngi Balang ba la lah, ong ka lad pathai khubor da kaba pynshong nongrim ia ki tyllong khubor na ka thain bad ki kynhun aijingsumar.

Ka lad pathai khubor kam shym la lah ban pynshisha da kabalaituid halor kane ka kam thombor ba dang shen eh jong ki RSF kaba la jia shisngi hadien ba ki shipai Sudan (SAF) kiba iatreilang bad ka sorkar ki la pynbna ba ki la lah ban pynpra ia ka jingshah kerkut ha ki RSF ha Dilling kaba la neh haduh jan ar snem mynta ha kaba ki la ioh ban bat ia ka bor halor ki lynti pynpoi mar ba kongsan.

Ka RSF bad ka SAF ki la don hapdeng ka thma pohiing kaba shyrkhei na ka bynta ban ioh synshar ia ka Sudan naduh u bnai Iaiong 2023, kaba la pyniap da ki hajar ngut ki briew bad pynkylla sakma da ki lak ngut kiwei pat.

Naduh ba la weng noh ia ka jingshah kerkut, ka Dilling ka la mad ia ka jingshah thombor lyngba ki drone kiba la pynjot ia ki jaka ai jingshakri bad wanrah ia ka jingiap bad jingmynsaw jong kiba bun ki briew.

Ki tyllong khubor na ki shipai ki la iathuh ha ka ba ka RSF ka dang pyrshang ban pynlong biang ia ka jingkhang dam, watla ka SAF ka dang iai bteng ban bat ia katei ka jaka bad pynpulom ia ki jingthombor hajan ka shnong ba kongsan jong ka Habila ha ka jylla North Kordofan.

Hapdeng kine ki jingia kynad ka Sudan Doctors Network ka la khot ia ka lynti iarap kaba kyrikieh ban pynpoi ia ki marbam bad ki dawai dashin kiba ban iarap ia ki briew. Ki tyllong khubor na ka thain ki la iathuh ba ka jinglong

jingman ha ka jaka ka dang long kaba shyrkhei, da ka jingduna kaba jur ha ki lad jingshakri ha ka liang ka koit ka khiah bad ka jingduna kaba jur bha ha ki tiar ba donkam khamtam eh ia ki um bam um dih.

Naduh ba ka la shah pynher krad na ka nongbah Khartoum,

ha u bnai Lber ba la dep ka RSF ka la pynleid jingmut bha ha ka thain Kordofan bad ka nongbah el-Fasher ha ka jylla North Darfur kaba dei ka kut ba khatduh jong ki shipai ha ka thain Darfur kaba heh bha tad haduh ba ka RSF ka la ioh kurup ia ka ha u bnai Risaw ba la dep.



**CAPTAIN WILLIAMSON SANGMA STATE UNIVERSITY,
TURA, JEWILGRE, P.O. DAMALGRE,
SOUTH WEST GARO HILLS, MEGHALAYA - 794105**

No.CWSSU/CANTEEN/01/2026/1 Date: 02/02/2026

NOTICE INVITING TENDER (NIT)

Sealed Tenders under Two-Bid System (Technical & Financial) are invited from reputed firms for providing catering services for office canteen in the Captain Williamson Sangma State University, Tura, Jewilgre, Meghalaya. Tender should reach the office of the Registrar Captain Wlliamson Sangma State University (CWSSU), Jewilgre, South West Garo Hills, Meghalaya, Pin-794105 on or before 13th February, 2026 up to 11:00 A.M. For details please visit Website: <https://cwssu.ac.in>.

**Sd/-
Registrar
Captain Williamson Sangma State University,
Jewilgre, Meghalaya.**

MIPR No. 2774, Dt. 06/02/2026